



*Sabtu, 07 September 2024*

**Ogen: Kejadin 27:15-29**



**NGAJARI KU SI LA PAYO**



Strategi seh kal pentingna i bas ndalani kegeuhen, la sitik masalah arus sialaken alu dalam pulah si mehuli guna njadiken kegeluhen reh ulina khususna gelah seh tujun sinuate sidatken. Bage me Ribka si enggo ngerana ras Jakub rikut arah kai sienggo ibegeina arah kata Isak man Esau anakna. E maka rikutken percakapenna ras Jakub, idalanken me 'drama' sienggo ibahanna. Ibuatna baju Esau gelah ipake Jakub, ibuatna kulit kambing itamana i bas tan ras kerahung Jakub gelah amin idadap bapana la ia curiga. Isikpakenna pangan si man baban ras kai kata-kata si man belasenken. Sempurna drama si enggo iatur. Kenca Jakub banci mpetetap ukur Isak maka ia Esau, ialokenna me pasu-pasu selaku kesusuren Abraham, Isak guna jadi pemimpin nandangi kesusurena denggo. Tuhu luar biasa cara ras 'drama' siibahan Ribka selaku nande singlarapken anak kesayangenna ngaloken pasu-pasu enda. Amin labo payo cara ras pengajaren siisehkenna man Jakub tapi i bas sura-sura, sitik pe Ribka la tanggung ngukuri ras erbahanca.

Cara ras pengajaren Ribka sitik pe la payo, selain erbahan drama palsu, erbual, nangko silabo kin hakna janah la seri idahna anak-anak si tubuh i bas bertinna nari. Banci saja la siarap biak nande bagi Ribka enda turah i bas dirinta selaku Moria, la siarap cara-cara si la uli si suanken ku bas ukur anakta. Erbuni-buni kita mere sen, ula teh bapandu ya, ula teh turangndu ya, bage me ninta. Siajari ia erbual gelah banci ibere bapana sen, mekuah ate kalak sideban alu 'naskah cerita' si karang kita. Pengajaren sibage rupana banci mperubatkan, desken racun singeracuni perukuren anak-anakta, hubungan si la sehat si enggo si benaken. Metengetlah ku lebe wari enda tambah persoalen si benaken kita tapi la ngasup kita ndungisa.